

Mafutaga Faafouina 2022

“Lotoifale” ma le Galuega Faafaifeau Mo Tupulaga Talavou (Youth Ministry - YM)

Saunia: Kara S. Ipiniu (Practical Theology)

Faatomuaga

O le upu ‘lotoifale’ e faasino i le ogatotonu o se fale. A talatala, ‘o le loto o lo o i totonu o le fale.’ A o le ‘fale’ i le faaaogaina e le tusiga o lo o ta’oto i le 2 Korinito 6:16e ‘Auā o i tatou o le malumalu [fale] o le Atua soifua...’ O le ‘fale’ o le tagata a le Atua, a o le ‘loto’ e faatatau i le fatu, o le ola ma le agaga o le tagata. O isi upu taua o lo o faasino i le loto, o le ‘saoloto’ ma le ‘lototele.’ O le tagata ua ‘sa’oloto’ e lē o le pule lava ia i ana mea e fai, ae o le tagata ua ‘sa’o le loto’ ina ua ta’iala e le agaga o le Atua. O le tagata e ‘lototele’ e tuu atoa le mafaufau ma le agaga ina ia faataunuu ma faaauau le finagalo o le Atua. O lona uiga o le ‘lotoifale’ i le faaaogaina e lenei pepa o le ogatotonugalemu o le tagata sa’oloto ua ta’iala e le agaga o le Atua, e lototele e faataunuuina ma faaauau le faamoemoe a le Atua e aunoa ma le logoitigā.

O se fesili ta’iala o lenei taumafaiga, e faafelea e le galuega faafaifeau mo tupulaga talavou (YM) ona fausia se lotoifale sa’oloto ma lototetele mo tupulaga auā le galuega a le Atua?

O lenei pepa o se vaaiga faa-lotoifale i le Galuega Faafaifeau mo Tupulaga Talavou (Youth Ministry - YM). I se taumafaiga e tali i le fesili autu, ua vaevaeina ai i isi foi fesili e tolu (3). Muamua, o le ā le lotoifale o le YM? Lua, o ā ni faafitauli o lo o feagai ma le lotoifale o le YM? Mulimuli, o le ā se tali atu ina ia faaleleia atili le lotoifale o le YM? E tele tali o nei fesili, e le o iai foi se atoatoa i lenei pepa ae faamoemoe i le agaga o le Atua faapea le tamaoiga sasa’a mai a le aufaigaluega i ni vaega e ao ona faaleleia atili ai se tasi nei o mataupu o lo o a’oa’oina e le A’oga Tusi Paia faapea le Kolisi i Malua i lalo o le matagaluega o le Practical Theology.

1. O le ā le lotoifale o le YM?

Faavae

A faatino loa se fuafuaga a se tufuga e fausia se fale, e muamua lava faataoto le faavae. O se tasi o ma’a e mua’i togi mo le faavae o le YM o A’oa’oga Tele (Great Commission) a Iesu Keriso. I faamaumauga a Mataio o lo o fetalai ai Iesu:

Ua tuuina mai ia te au le pule uma lava i le lagi ma le lalolagi. ¹⁹ O lenei ia outou ō atu e fai nuu uma lava ma soo ma papatiso atu ia te i latou i le suafa o le Tamā, ma le Atalii, ma le Agaga Paia. ²⁰ Ia outou a’oa’o atu ia te i latou ia tausi i mea uma ua ou fai atu ai ia te outou; faauta foi, ou te ia te outou i aso uma lava, e oo lava i le gata’aga o le lalolagi. (Mataio 28: 18b-20)

I so o se galuega tala’i ma le a’oa’o atu a le Ekalesia, e taua le faaogatonu o a’oa’oga a le Tusi Pa’ia aemaise o lona fatu o Iesu Keriso (Christ-centric). E faapea foi le YM auā na fetalai Iesu i le au soo e a’oa’o atu soo se tagata ina ia iloa ona tausi i mea uma sa

ia a'oa'oina ai latou. O totonugalemu o A'oa'oga Tele e tatau ona taoto ai le faamoemoe autu o le Youth Ministry.¹

O le manulauti foi lea a le EFKS e faatatau i le YM e pei ona ta'ua i lana faavae (2016).

O le Galuega faa-Faifeau i le Feagaiga Fou, e le gata i le talai ma lauga, a o le a'oa'ob'atu. O lea, o taitai o Au Talavou ma faiaoga o Aoga Aso Sa, o isi ia vaega o le galuega faa-Faifeau ina ia latou maua le Agaga Paia o le Atua e taitaiina ai i latou, ina ia latou faamatala ma le manino e tusa ma le Faaaliga a le Atua ia Iesu Keriso, ina ia iloa ma faafouina ai olaga o tupulaga. E ao lava ina ia mau tulaga ma faatau aafia ai vasega uma o tagata i le galuega faa-Faifeau a le Ekalesia. O galuega tau A'oa'oga Kerisiano mo Tupulaga Talavou, o se isi lea faailoga o le ola o le Ekalesia.

E iloa le ola o le ekalesia i lana galuega mo tupulaga talavou ma Aoga Aso Sa. E tusa ma le faavae, o le matafaioi a le ekalesia ma ona ta'ita'i o le Au Talavou ma A'oa'oga Kerisiano, o le faamoemoe ina ia faafouina o latou olaga ma amio, ma ia tumau ai.

O le ala foi lea o le faamamafa a le Aoga Tusi Pa'ia (MBS) ma le Kolisi i Malua faatasi ma le fita i tuga a le vaega o A'oa'oga Kerisiano a le ekalesia, EFKS TV, ma aulotu taitasi i Aoga Aso Sa ma Autalavou. I Malua ma le MBS o lo o a'oa'oina ai mataupu e pei o A'oa'oga Kerisiano, Tapuaiga Kerisiano, Fausia o Lauga, A'ogā Lauga ma isi. O mataupu nei, faatasi ai ma isi e pei o le Talafaasolopito, Mataupu Silisili ma Su'esu'ega i le Tusi Pa'ia e telē lo latou sao i le YM. O le faatinoga o lo o i ai mataupu e pei o le Galuega Faamasani, Felaugaiga, o le Faamati a faletua po o latou asiasiga mo vaega e faaleleia atili ai taligāmalo ma isi faamoemoe taua mo le galuega a le Atua.

O lo o faatino foi e le Matagaluega o A'oa'oga Kerisiano le galuega fitā mo fanau ma tupulaga e ala i le tuufaatasia, tufatufaina o tusi A'oga Aso Sa ma Tupulaga faapea galuega faatino i ekalesia. E telē foi le sao o le EFKS TV i le atina'eina o nuu ma ekalesia e ala i ana polokalame mo tupulaga e pei o le 'Aua le ai niu malili' ma le 'Youth Debate.'

Aemaise ai o galuega faifaipea a aulotu i Aoga Aso Sa, Aoga mo Faiaoga Aso Sa, Aoga Faifeau, ma Autalavou. O asiiasiaga a le aufaigaluega, faamati, faapea ana felaugaiga i pulega ma matagaluega. O nisi nei o faata'ita'iga o le tapenaina e le EFKS o le tino atoa (tino, mafaufau, agaga) o Keriso po o le ekalesia mo tupulaga talavou. O le YM ua na o se vaega o le tino atoa lea o Keriso (2Kor 12:12-26). A lē faatinoina lea matafaioi, pe fai foi ae faatagā fai, ona iai lea o se avanoa po o se mea ua misi i le soifuaga o le tagata Kerisiano ua lē faatumuina. Mo se faataitaiga, o le a lē mafai ona faaauppegaina tupulaga talavou ina ia i ai le sa'olotoga moni i totonu o le ekalesia ma maua ai le lototele i taimi e feagai ai ma faafitauli ma lu'itau o le ola.

Galuega Faafaifeau mo Tupulaga Talavou

O le siosiomaga na mua'i fausia ai le YM e le i faigofie. O se vaitau na faateteleina ai le amio leaga e pei o le mana'o lē faamalieleina ma le augapiu o se faamaoni i le va o ulugalii Kerisiano i Amerika. Sa faalauiloa ai se maliega e ta'ua o "Proposals for the Revival of Dying Religion."² Na amatamea ai ni faifeau ma nisi sa talia lea maliega i le faia o ni feiloaiga i vaiaso ta'itasi mo mafutaga tatalo, aoga Tusi Pa'ia, a'ogā lauga ma pesepesega. I le 1860, faavae ai le YMCA³ ma avea ma ta'iala ni vaega se tolu.

¹ Strong P. 2014. Effective Youth Ministry: Embracing a family-oriented approach', 2.

² Pastor Cotton Mather (1663 – 1728)

³ Young Men's Christian Association

1. Ia avea ma se faapotopotoga e liua loto ma agaga,
2. Ia atina'eina le amio faaKerisiano, ma
3. Ia tapena ma faamasani sui fou i galuega faa-le-faatuatua.

O lo o faamamafa lava le tapenaina o le lotoifale o tupulaga talavou. Sa faatupula'ia tupulaga i lea auala auā e le i leva ae faavae loa isi faapotopotoga e pei o le Young People's Association, Christian Endeavour (Au Taumafai Kerisiano), Young Life, Youth for Christ, Youth With a Mission, Prayer Watcher's Group (Mafutaga Tatalo Auleoleo). O nisi o nei vaega o lo o faatinoina lava e le EFKS. E ui i le tele o nei faapotopotoga ma faafitauli e le i mate ai le lamepa o le YM, o lo o tumau pea le faavae na ulua'i faatū ai faapea tagata e aofia ai.

Tupulaga Talavou

O le talavou o se tagata ua tu'ua le ola faamoemoe i isi ae agai atu i le mafai ona ola tutoatasi o se tagata matua, aemaise ai lona silafia i le taua o le ola fetausia'i ma isi o le aiga, nuu, ma le ekalesia. O le taimi nei, o le autalavou e lē o faatapula'aina se tausaga ae tatala mo soo se tagata.⁴ E ui o lo o iai se finauga i le tatau ma le lē tatau ona faatapula'a tausaga, ae o lo o tumau pea le faamoemoe.

Galuega Faafai'ea mo Tupulaga Talavou (YM)

O le YM o se tiute faaleagaga e limata'itai'ina ai le lotoifale o tupulaga talavou ua sui mai le tamaititi agai atu i le avea ma tagata matua.⁵ O se galuega o lo o tapena ai le fesootaiga faaleagaga o sui auai ma le Atua. O le YM fo'i o se tali atu a tagata Kerisiano i mana'oga o tupulaga talavou, ma le fefaasoa'i o a latou meaalofa.⁶ O le faavae o lea lagona o le galuega a Iesu, sa ia faamalolo, fafaga, liua o latou olaga, ma ia lu'i i latou ina ia iloa ona fai atu i isi e pei ona ia mua'i fai mo latou. Finau foi se tasi o tagata su'esu'e o le YM, o le taumafaiga e faatumau, faamasani ma faaofi atu tupulaga i totonu o le lotoifale o le galuega a le Atua.

O le isi vaega taua o le tali atu i mana'oga o tupulaga, o le iloa lelei o lu'itau o lo o feagai ma i latou aemaise ai o le iloa po o fesoasoani pe faateteleina e le YM ia lu'itau.

2. O ā ni faafitauli o lo o feagai ma le YM?

Tupulaga Talavou i Samoa

E tusa o le ripoti a le Ofisa o Faamaumauga a Samoa 2016, e 42% (81,557) o le fuaitau aofai (195,979) o Samoa o tagata e 10-34 tausaga le matutua. Mai le 50,182 o tagata e i le 18-35 tausaga, o le 28.3 (14,202) o tupulaga talavou e mai le EFKS e pei ona faaalua i le ata i lalo. O le EFKS o lo o to'atele ai lava tupulaga talavou, soso'o ai ma le Katoliko Roma (9,481) ma le Mamona (8,581). E le o iloa i nei fuainumera po o ia tupulaga uma ua na o le faalagi e EFKS ae le iloa po o galulue. O se itu foi e mana'omia le toe su'esu'eina ina ia fua iai a tatou auala mo tupulaga po o talafeagai pe leai.

⁴ Philippa Strong, 2014, 'Effective Youth Ministry: Embracing a family-orientated approach', *In Die Skriflig* 48(1).

<http://dx.doi.org/10.4102/ids.v48i1.1715>

⁵ UNESCO, 2014, *What do we mean by 'youth'?*, viewed 16th July 2022, from <http://www.unesco.org/new/en/social-and-human-sciences/themes/youth/youth-definition/>

⁶ East, 1997.

Table 3.5: Youth population aged 18-35 years by religious affiliation and sex, 2016

Religion	Total	% of Total	Male	% of Males	Female	% of Females
Total	50182	100	25573	100	24609	100
EFKS/ Congregation CCS	14202	28.3	7278	28.5	6924	28.1
Roman Catholic	9481	18.9	4767	18.6	4714	19.2
Latter Day Saints	8581	17.1	4374	17.1	4207	17.1
Methodist	6157	12.3	3211	12.6	2946	12.0
Assembly of God	3445	6.9	1755	6.9	1690	6.9
Seventh Day Adventist (SDA)	1718	3.4	872	3.4	846	3.4
Worship Center	1494	3.0	719	2.8	775	3.1
Other Churches	1269	2.5	655	2.6	614	2.5
Pentecostal	482	1.0	226	0.9	256	1.0
Voice of Christ	472	0.9	250	1.0	222	0.9
Seventh Day Adventist (SISDAC)	455	0.9	227	0.9	228	0.9
Jehova's Witness	403	0.8	192	0.8	211	0.9
Nazareth	335	0.7	168	0.7	167	0.7
Peace Chapel	222	0.4	106	0.4	116	0.5
Bahai	216	0.4	119	0.5	97	0.4
Amazing Love Christian Church	203	0.4	109	0.4	94	0.4
Bible Study/Aoga Tusi Paia	193	0.4	105	0.4	88	0.4
CCCJ Samoa (EFIS)	180	0.4	90	0.4	90	0.4
Baptism	165	0.3	87	0.3	78	0.3
Christian Fellowship	157	0.3	85	0.3	72	0.3
No religion	97	0.2	56	0.2	41	0.2
Protestant	68	0.1	29	0.1	39	0.2
Angelic	66	0.1	33	0.1	33	0.1
Evangelism	35	0.1	18	0.1	17	0.1
Elim	34	0.1	12	0.0	22	0.1
Muslim	28	0.1	17	0.1	11	0.0
Not Stated	24	0.0	13	0.1	11	0.0

E lelei toe leaga foi le to'atele o tupulaga talavou i le EFKS. E lelei i le tulaga o le faailoga o le ola ma le faatupula'ia o le galuega mo Autalavou. Ae leaga pe afai o lo o molimauina pea nisi o faafitauli e pei ona faasoa iai a'oa'o ma faletua, faapea nai tagata lotu i Upolu ma Savaii a le Aoga Tusi Paia i taimi o vasega faapea polokalame faamasani i Tanumalala, Nofoga o Faamoemoega (SVSG) ma isi foi.

Mo se faataitaiga, ua tauau ina le mafai e matua ona faatonufofau talavou, a faiatu iai ae faalala mai le aiā tatau, sola ese, e oo lava i lagona o le pule i le ola. Ua pule lava fanau pe aga'i i autalavou ma le lotu. O lea faafitauli ua avea ma ala ua ese lava le ekalesia a matua ese le faapotopotoga e agai ai fanau. O nisi foi ua uma atu lava le soifua tautua o matua ma lē toe iai lava nisi o le fanau e faaauaua.

Ua nofo fale i aai o finagalo le tele o mafuaaga o le tutupu o nei faafitauli. O se tasi o manatu ta'atele o le itu tau tamaoaga (economic) po o le tele o mea fai auā o le taga lava e tasi e sau ai tupe mo le aulotu faapea le autalavou. O isi foi o mafuaaga o le eseese o manatu o matua ma fanau i mataupu tau aga fesootai (social), faalelotu (religious), faaupufai (political) ma isi foi. E itiiti se avanoa o lenei pepa e talanoaina ai le tele o ia mataupu. Pau le tulaga ua mautinoa, ua i ai se feteenaiga i le va o matua ma fanau ma o lona i'uga ua lē faaauaua e fanau ekalesia sa galulue ai matua.

O le taumafaiga masani lava a le sosaiete e fo'ia ai nei ituaiga o faafitauli o le taula'i o tuuaiga ma faatatauga uma i tupulaga talavou. E.g. faasala, faate'a, fa'aoolima pe faatalanoa foi tupulaga. E lē sese lea auala auā e i ai foi o latou taua. Peitai, e lē itiiti foi le sao o matua, le aiga, ma le ekalesia i le faatupula'ia o ia lu'itau. O le taumafaiga ina ia tuu faasolo ma faaauau le soifua faatuatua o tupulaga talavou i totonu o se talitonuga faaKerisiano e tasi, ua manatu ai nisi e alagataua ona galulue so'oso'o tauau le ekalesia ma le aiga.⁷ O le aiga e taua tele lona sao i le fausia o ni lotoifale

⁷ Strommen and Hardel (2008:19)

sa'oloto ma lototele mo tupulaga talavou. E manatu foi le pepa, o le aiga e amata ai se tatou tali atu i faafitauli o lo o ta'ua.

3. O le ā se tatou tali atu i nei faafitauli ina ia faaleleia ai le lotoifale o le YM?

Aiga o le Atua

E muamua fausia e le Atua le aiga a e le i iai se lotu/ekalesia e pei ona atagia i le tusi o Kenese faapea le feagaiga fou.⁸ Na faavaeina e le Atua le ulua'i aiga ina ua ia faia le tamaloa ma le fafine i le amataga ma le faamoemoe ia fanafanau ma uluola.⁹ I le feagaiga fou o lo o ta'ua ai o tagata uma o le ekalesia po o le 'au paia e faalupe o le "aiga o le Atua" (Efeso 2:19; 1Tim 3:15). O le faamoemoe o lea faalagiga ia mātua vavalalata le mafutaga a tagata auai i le ekalesia e pei foi na tatau o na i ai i le aiga. E lē gata o le mafutaga a le tagata ma le Atua a o le tagata ma leisi.¹⁰ Ae e tatau lava ona faamuamua le Atua i totonu o soo se aiga (Efe 6:2-4; Ioane 15:12; Mat 6:33; 10:37-39). O lona uiga o se aiga e maua'a lona faavae e tatau ona vavalalata le mafutaga a sui uma aemaise o le va fesootai ma le Atua.

E taua le tiute a matua i le aiga. I le Teuteronome 11:19 fetalai ai le Atua: 'Ia outou a'oa'o atu ai i a outou fanau, ma tautalatala ai pe a e nofo i lou fale, pe a e savali foi i le ala, pe a e taoto, pe a e tulai foi.' O le siosiomaga o le aiga o lo o talanoa ai le Teuteronome. O matua o i latou o puluvaga (mediator) i le va feagai ai o le aiga ma le Atua aemaise ai o le faailoa atu o le Atua i fanau.¹¹

O le aiga o se faavaa (framework) lea e faatupula'ia ai le soifua fesootai, faatasi, fatufatua'i/foafoa, ma le fetausia'i i totonu o le galuega a le Atua. O le Atua o se 'Atua o aiga.' Afai e toe fia faaolaola le galuega a le ekalesia mo tupulaga talavou, e tatau foi ona faaoga ai le faavaa o le aiga. Ae le gata i lea e tatau foi ona faataua e le ekalesia aiga o tupulaga talavou.

Matafaioi faa-le-aiga i le YM

O tupulaga talavou o le matafaioi fai faatasi a matua, ta'ita'i o autalavou, au matutua, tiakono, nuu, ekalesia atoa, malō, faapea tupulaga talavou lava ia. E lē mafai ona fe'alofa'i ai se tasi mai ia matafaioi.¹² Peitai ona o le taimi ma le avanoa o lenei taumafaiga, o le ā faaamatala na o le lua, o matafaioi a matua ma le ekalesia.

Matua

O le matafaioi a matua o le faafaileleina o le soifua faaleagaga o fanau, e lē o se uluai matafaioi a le ekalesia, poo le YM.¹³ O matua o uluai faiaoga ia o fanau. E faamasani, atina'e ma tu'ufaasolo e matua se soifuaga faaleagaga mo latou fanau. E masani ona faalagi o fanau o le meaalofa mai le Atua, e tatau ai le tausii ma tapu'e soifua o le fanau

⁸ Anderson 2007, 189

⁹ Kenese 2:19-24, cf. Richardson 1996, 15.

¹⁰ Faaopoopo e Amaama Tofaeono le siosiomaga i le aiga (household) lea, ae leai se avanoa o lenei tusiga e toe faamatala ai lea tulaga.

¹¹ Nel 2001, 12.

¹² Nel 2001, 4-5.

¹³ Barna 2007, 25; Schlect 2007, 3

i ala o le Atua. E a'oa'oina le fanau ina ia iloa ona auauna atu i le Atua ma o latou loto, agaga, malosi ma mafauafau atoa (Sal 127:3-5; Teu 6:5-9 mf).

E lua ituaiga mātua sa ta'ua e se tasi o tagata su'esu'e. O mātua muamua e talitonu o latou tiute o le faataoto o ta'iala faa-le-Atua. O le faailoga o le manuia mo ia ituaiga mātua o le amio faaalua a fanau. E sa'oloto pe 'sa'o le loto' o lo o faatino ai so o se fuafuaga a matua. E lototele foi e faatino auā e ui ina faigata ae i'u i le manuia ma le fiafia. A o mātua lona lua, o matua ia e leai pe lē faataua se fuafuaga poo se alafua mo le soifua faaleagaga o fanau. E mafua ona e le i a'oa'oina i le faafaileleina o le soifua faaleagaga o fanau.¹⁴ O matua ia e faauiga sese le sa'oloto i le tuufau e aunoa ma se ta'iala.

I le su'esu'ega a Barna, o matua e faataua le soifua faaleagaga o fanau e taulamua i la'ua i le faasino ma le faatonu o fanau e ala i le olaga o lo o la soifua ai. Mo se faataitaiga o le faia o afiafi faa-le-aiga, o le soifua tatalo ma le anapogi, faasoa faaleagaga ma le tele o isi auala e faataitai ai i fanau. O leisi itu taua sa ma'ua e lenei su'esu'ega, o le a'oa'oina o fanau i le ola faaleagaga o se ulua'i matafaioi a matua, a o le matafaioi a le ekalesia o le toe faamamafa ma le faaauau o nei a'oa'oga uma.

O fanau foi o se mea pu'e ata. E tele lava na latou faatino ma tausisi i aga tausili ma talitonuga a latou matua. A opogi ma soifua matua i se soifuaga Kerisiano, e faatino ma mulimulita'i foi iai fanau.¹⁵ Ae ou te faasa'oina foi se isi manatu, e lē faapea a sa'o le auala e faasino e matua ona mautinoa ai lea o le mulimuli ai o fanau. E le faapea foi e sese le alafua na faataoto e matua, ona sa'o ai lea o le mea e aga'i ai fanau. Po le a le ituaiga matua, aua nei galo e iai le taimi o le olaga e fai ai le filifiliga a le tagata e uiga i le Atua.¹⁶

E tatau foi ona silafia e matua e lē mafai ona latou faamalosiā fanau ina ia alofa, ava ma usitai i le Atua. O le galuega mana lea a le Agaga Paia (Efes 3:17; Jn 6:44). Aua foi nei naunau ina ia amio lelei nauā fanau (moralizing) ae pa'ū ai i le vaivaiga o le faafoliga i luma o matua, ae a o ese atu ua alu faasoloatoa. E le gata i lea, e avea ai le Talalelei ia Iesu Keriso ma ni tulafono e faasāsā ma saisaitia ai, ae lē o le faaolataga ma le alofa tunoa o le Atua ua 'sa'oloto' ai le tagata. E faata'oto e matua le faataitaiga lelei mo fanau, a o le lotolotoi o le Agaga o le Atua e faatupula'ia ma matua ai le soifua faaleagaga o fanau.

Ekalesia

O le matafaioi a matua le faafaileleina o le soifua faaleagaga o fanau, a o tiute a le ekalesia le fesoasoani i matua. O le ekalesia e mafai ona faamatalaina o se isi aiga i fafo/tua atu o le aiga masani. O le ekalesia o le tino o Keriso po o le Aiga o le Atua (Efes 2:19; 1 Tim 3:14-15; I Ioan 3:1). E eseese uma itu tino ae a tuu faatasi ona avea lea ma tino e tasi ia Keriso. E faapea foi le YM, o se vaega taua o le aiga po o le ekalesia. O tupulaga talavou foi o latou o itu tino o le aiga o le YM. O ta'ita'i o autalavou e faamanatu ma faamalosi'au i le ekalesia lo latou sao taua i le YM, aemaise o le alofa

¹⁴ The Barna Group 2009

¹⁵ Hardel 2008, 89.

¹⁶ Dean 2004, xiii

atu ma le manatua o tupulaga talavou i latou talosaga, lauga, ma faaiuga fai. Ia amana'ia ma faatonutonu ae lē o le faamasino atu i talavou pe a sese, auā o latou ua na o ni Kerisiano talavou.

O felaugaiga e iai vaega taua e fesootai ai ma le Great Commission i le Mataio 28. O lo o atagia ai le ō atu e fai nuu uma ma soo, e ala i le tala'i ma a'oa'o atu i le suafa o le Atua le Tamā, le Alo, ma le Agaga Pa'ia. E faamasani ma a'oa'oina ai le failauga i le faiva o le folafola o le Talalelei. E fesuisuia'i ai foi le faalogologo a ekalesia i isi tofi e ese mai o latou lava faifeau. Ae e iai le manatu o le pepa, pe le o se auala foi lea e faata'i, faafailele, faaosofia ai le naunautaiga o tupulaga talavou e auai i tapuaiga ma tumau i lana talitonuga faa-EFKS. E ō faatasi ma le tofi e faitau le Tusi Paia, faamatala le tala a tamaiti, tatalo pe pese foi. Ia latou iloa ma a'oa'oina le taua o ia vaega o le ola faaaogaina mo le Atua. A uma foi le sauniga, e faaaoga tupulaga e folafola to'anai, o ava ma isi. E maua ai foi le avanoa e galulue faatasi ai tupulaga ma fesuia'i ai latou meaalofa/agavaa ma talavou o isi ekalesia o lo o agai iai le felaugaiga. A o lea e a'oa'oina ma faatinoina uma ia mea i totonu o le aiga o le Atua po o le ekalesia.

E le gata i le felaugaiga ae faapea foi i faamati ma isi asiagiaga e pei ona faatinoina mo le galuega a le Atua. O lo tatou matafaioi o le aoao atu ma le tali atu i manaoga o tupulaga talavou e pei foi ona faatino e Iesu Keriso. O le ekalesia o se aiga i tua atu o le aiga. O le YM o se itu tino o le galuega a le Atua, a o talavou foi o se vaega o lea itu tino. Atonu o le ala lea sa faaalua ai se finagalo a se tasi o tinā o le Bible School, pe le tataua ona i ai se tausaga e faaleleia ai meatotino o aiga o le aulotu i taimi o Faamati. Mo lea mafine, a lelei ma maloloina le lotoifale o le aiga, o le a mamanuina foi ni tupulaga e sa'oloto ma lototele e tautuaina ma faaaauua le galuega a le Atua mo le lumana'i. O se fingalo e leai tele se agavaa o le fai pepa e tali i ai, ae o le a tu'u atu pea i luma o le mafutaga po o le a se finagalo i lea tulaga.

Upu Faai'u

Le mafutaga e, e le a'oaia e le auauna faatauvaa le tofā ma le faautaga. Ae o se faamanatu ina ia toe silasila i le taua o le faavae mai le Tusi Paia ma le Ekalesia e faatatau i le galuega a le ekalesia mo tupulaga talavou. O mamanuina e le YM se lotoifale mo tupulaga talavou e sa'oloto ma lototele e faaaauua le galuega a le Atua e ala i lana ekalesia? O fesoasoani e fo'ia faafitauli o lo o feagai ma tupulaga talavou? O atagia i a latou amio? O Faafouina o latou loto e ala i le tatou galuega, faa-matua po o matafaioi faa-ta'ita'i o ekalesia ma aulotu, o le a'oa'o atu aemaise o le tatou soifua ma ola ai? O faapeii mai le lotoifale o aiga o tupulaga talavou? O fesoasoani le ekalesia i le faaauppegaina o matua o tupulaga talavou?

E mana'omia foi e lenei mataupu o le YM so outou finagalo i nisi o vaega e faaleleia ai auā le autovaa mai o tupulaga i Malua faapea le Aoga Tusi Paia. E aoga foi la outou fautuaga i taimi o pepa, faapea foi pe a maua se avanoa i taimi o vasega e faasoa ai le experience i le galuega mo le 'au aoga ma o matou tagata faatauvaa.

Faafetai tele mo lo'u avanoa.

Ma le faaaloalo lava,

Manuia le Mafutaga Faafouina 2022!